



## UNIDADE 7

# Só ou acompañado?

**Nesta unidade imos determinar as calidades da nosa parella ideal. Para iso, imos aprender:**

◆ a expresar condicións e consecuencias hipotéticas ◆ algúns verbos con preposición ◆ a falar de sentimentos, do carácter e da personalidade ◆ vocabulario para falar de relacións persoais e afectivas ◆ conectores para engadir, matizar, contraponer e desmentir unha información ◆ algúns usos e valores das preposicións

## 1. SOLTEIROS, PERO NON SÓS

**A.** Coñeces moita xente que viva soa? Todos o fan polos mesmos motivos?

- *Eu teño algúns amigos que viven sós. Algúns están solteiros, outros separados...*

**B.** Unha revista publicou as testemuñas de dous homes e dúas mulleres que viven sós. Le os textos e anota as vantaxes e os inconvenientes que comentan da súa situación. Despois, compara as túas anotacións coas dun compañeiro.

## Sós ou independentes?

Ser solteiro xa non é o que era, e proba diso é que cada vez hai máis xente que vive soa. A través das testemuñas de varias persoas, exploramos os porqués deste fenómeno e como se leva ser solteiro hoxe en día.



### Marcela, 37 anos Divorciada

Eu, se puidese elixir, no canto de estar soa, preferiría estar ben con alguén. Iso si, con alguén que me comprenda, que pense coma min. Non con calquera. Ao principio foi moi duro non ter parella. Gañas liberdade, pero perdes outras cousas. O mellor é que me sinto máis relaxada e gozo moito da relación cos meus fillos. Iso si, como nai, teño outras responsabilidades e, cando penso en se volverei encontrar alguén, doume de conta de que as miñas esixencias son moito maiores. De feito, volvinme máis autosuficiente e máis desconfiada, pero non renuncio á idea de compartir de novo a miña vida con outra persoa.

### Euloxio, 47 anos Divorciado

Se tivese que escoller entre só ou mal acompañado, quedaríame coa primeira opción. Agora tócame estar só e acéptoo. Levo dez anos sen parella e esa soidade permíteme tomar decisións sen pensar noutra persoa. O de perder a cabeza por alguén é parte do pasado. Non é que me ille do amor, ao contrario, o que pasa é que non o busco como facía cando era máis mozo. Teño moitas parellas ao meu redor e non sinto envexa por ningunha delas. Pero se encontrase unha persoa con ganas de empezar algo novo, volvería formar unha familia.

### Alba, 35 anos Solteira

Non quero renunciar a nada por estar con outra persoa. Ademais, prefiro estar soa en vez de mal acompañada. Levo moi ben estar solteira. Nestes tempos é diferente, de feito, ser solteiro está de moda. Os solteiros somos unha comunidade e é fácil encontrar clubs para coñecer xente que comparta os mesmos intereses e facer cousas xuntos. Ademais, sei que se estivese en parella non faría moitas das cousas que fago. Recoñezo que ás veces botas de menos o cariño, organizar cousas con outra persoa, ter unha familia... En realidade, estou dándolle voltas á idea de formar a miña propia familia eu soa. Son moi independente e decidida, sei o que quero e así síntome plena.

### Alberte, 50 anos Viúvo

Aprendín a ser feliz só; non necesito a ninguén que encha a miña vida. Co tempo deime de conta de que son unha persoa moi independente e estou moi ben así. Estar só non é unha traxedia, ao contrario, é unha oportunidade para coñecerte e aceptarte como es. Por suposto que, se encontrase alguén que me quixese e que compartise intereses comigo, me apetecería recuperar a complicidade propia dos que viven xuntos por amor. Pero, por outro lado, pásalo ben experimentando cousas novas e coñecendo xente coa que tes afinidades. Ademais, son moi consciente de que non podo recuperar o que perdín.

VIVIR SÓ	
VANTAXES	INCONVENIENTES
Tes moita liberdade	

C. Identificaste con algunhas das afirmacións destas persoas? Coméntao cos compañeiros.

- Eu estou de acordo con Euloxio, non se debe buscar, pero se aparece...
- Si, talvez funciona así, pero...

D. En parellas, decidide se existe un perfil típico das persoas que viven soas. Cal é? Tomade notas e, logo, comparádeas coa información desta páxina web de *singles*.

**SINGLES**

**Un *single* non é máis ca un solteiro, pero a palabra galega pode ter connotacións negativas (soidade, falta de compañía). Por ese motivo, prefírense novos termos para designar as persoas que conforman este grupo social: “os independentes”, “os neosolteiros” etc. En calquera caso, así son:**

- Teñen entre 30 e 55 anos.
- A maioría vive na cidade e cerca dos núcleos urbanos.
- Algúns son *singles* por vocación ou por decisión propia, porque lle dan preferencia á súa carreira profesional; outros sono por causas alleas á súa vontade: defunción da súa parella, divorcio, dificultade para encontrar unha parella estable...
- Posúen un alto nivel cultural e adquisitivo. Profesionalmente son persoas cualificadas.
- Gastan moito diñeiro en viaxes, produtos de beleza, artigos de luxo e ocio en xeral.
- Pagan con tarxeta e adoitan comprar por Internet.
- Son moi independentes, competentes, seguros de si mesmos, amantes do risco e preocúpanse pola súa imaxe.
- Son sociables e buscan en Internet novas formas de relacionarse: chats, foros...
- En Estados Unidos algúns *singles* levan un anel cun diamante na súa man dereita, non só como símbolo de pertenza ao grupo, senón tamén do seu poder adquisitivo.

## 2. PREPARADO PARA VIVIR EN PARELLA?

**A.** Estás preparado para vivir en parella? Contesta as preguntas deste test e compróboo. Logo, comenta as respostas cos teus compañeiros.

### 1. Para ti os compoñentes dunha parella son como...

- a) o ceo e o inferno
- b) o café e o leite
- c) dúas gotas de auga

### 2. Se estiveses na casa esperando a túa parella que se está preparando para saír e tarda moitísimo...

- a) **daríaslle** un bico e **marcharías**.
- b) **axudarlíalle** para que fósedes máis rápido.
- c) **comezarías** a ver a tele e **diríalles** que se tomase o seu tempo.

### 3. No voso aniversario, sentiríate máis feliz se a túa parella...

- a) te **agasallase** con algo moi, moi caro.
- b) te **levase** ao lugar onde vos coñecestes. Aqueles foron os mellores tempos.
- c) **colgase** carteis pola cidade dicindo que non pode vivir sen ti.

### 4. Se tiveses problemas coa túa parella...

- a) **procurarías** as causas, a orixe da situación.
- b) **analarías** as consecuencias desa situación.
- c) **propoñeríaslle** ir a un conselleiro matrimonial.

### 5. Se descubreses unha infidelidade...

- a) **cometerías** ti outra para compensar.
- b) **recordarlíallo** constantemente.
- c) **esqueceríallo** para sempre.

### 6. Se puides planificar a viaxe perfecta...

- a) **preferirías** ir só/soa; así **poderías** coñecer máis xente durante a viaxe.
- b) **darías** a volta ao mundo cos teus amigos e **pasarías** uns días coa túa parella.
- c) **levarías** a túa parella a un lugar paradisíaco.

**C.** Completa os seguintes enunciados coa túa opinión.

1. Se de repente me cruzase co meu actor ou actriz favorita, ...
2. **Deixaría** de traballar para sempre se...
3. Se atopase na rúa unha bolsa chea de cartos e sen identificación do propietario, ...
4. Se....., **queixaríame** aos responsables.
5. Se un descoñecido me dixese “apetécame pasar a tarde contigo”, ...
6. Se....., **volvería** estudar.

## 3. DE FLORES, DE HUMOR, DE CADA UN

**A.** Segundo os expertos, estas son algunhas das cousas que debemos facer acotío para nutrir e manter unha boa relación de parella ou de amizade. Cal che parece a máis importante? Cal consideras máis difícil de cumprir? Engadirías algunha máis? Coméntao cos teus compañeiros.

- Manter a amabilidade e o respecto **antes de** nada.
- Saber equilibrar **con** madurez as posicións **de** poder.
- Pedir desculpas **por** calquera comportamento ou actitude desagradable.
- escoitar e apoiar **no canto de** acusar e criticar, principalmente **en** momentos difíciles.
- Sorprender ocasionalmente **con** algún detalle como un ramo **de** flores, un libro ou unha cea **no** restaurante favorito.
- Enfrontar as dificultades **con** tolerancia e sentido **do** humor.
- Respetar as diferenzas **de** cada un.
- Non impoñer regras e deixarse levar **cara a** unha relación natural e duradeira.

**B.** As palabras e expresións destacadas en grosa son preposicións e locucións prepositivas e empréganse para establecer relacións de diversos significados entre as palabras. Clasifícaaas na seguinte táboa segundo o concepto máis axeitado en cada caso. Logo compara a túa clasificación coa do teu compañeiro e acláraseo co voso profesor.

Materia/Contido	
Dirección	
Causa	
Orde/Posición	
Lugar	
Caracterización	
Poseción	
Tempo	
Modo ou maneira	

### Resultados

**Maioría de A:** A idea de parella perfecta non vai contigo. Aceptas certos compromisos sempre que non interfiran na túa liberdade. Necesitas que ninguén che controle o teu destino.

**Maioría de B:** Es realista e dubidas á hora de lanzarte á vida en parella. O xogo

da sedución atráete e angústiate. Evitas o conflito.

**Maioría de C:** Queres e sabes apaixonarte pola persoa que vive contigo. Vivir a dous reafirmate e dáche enerxía porque compartes proxectos comúns coa túa parella.

**B.** Observa as palabras marcadas con cores no test e completa o seguinte cadro:

	Cor	Tempo verbal
Unha condición difícil ou imposible de realizar		
Unha consecuencia desa condición		

## Preposicións e locucións prepositivas

As preposicións son elementos invariables que serven para unir as palabras, establecendo entre elas relacións de diversos significados. Constitúen un repertorio bastante extenso, pero as máis frecuentes en galego son: **a, agás/excepto, ante/perante, ata, con, contra, de, dende/desde, en, entre, para, por, sen, sobre, tras, onda.**

Tamén é ampla a lista das **locucións prepositivas**, que son grupos de palabras que funcionan coma unha preposición.  
**cara a:** *Ía **cara a** o museo cando o atopei.*  
**por mor de:** *Deixaron de farse **por mor da** herdanza dos pais.*  
**a/en prol de:** *Participei na manifestación **a prol** dos dereitos dos traballadores.*  
**antes de:** *Teño que preparar un informe **antes de** marchar.*  
**no canto de:** *Déixame o azul **no canto do** verde.*

Entre as referencias semánticas que as preposicións achegan ás relacións que establecen, atópanse as seguintes:

**Caracterización:** *un neno **con** carácter; a cabina **de** control.*  
**Modo/Maneira:** *Traballa **con** atención; Fixémolo **entre** os dous.*  
**Tempo:** *Vexo o telexornal **do** serán; Chegou **ás** sete e media.*  
**Lugar:** *Vivimos **en** Verín; Direino **ante** o xuíz.*  
**Compañía:** *Tomou xamón **con** melón; Traballamos **con** María.*  
**Materia:** *Envieille un ramo **de** flores; A caixa era **de** acrílico.*  
**Poseción:** *Este libro é **de** Mateo, Viches o novo coche **de** Xan?*  
**Causa:** *Fixose cura **por** imposición da nai; Preocupábame **por** ti.*  
**Oposición:** *Que tes **contra** min?; Todos van, **agás** Xan.*  
**Orde/posición:** ***Antes de** saír, remato este traballo.*  
**Orixe:** *Vén **de** Nova York; Sandra é **de** Caldas.*  
**Dirección:** *Cando o vin, ía **cara á** igrexa; Pedro foi **onda** o pai.*  
**Instrumento:** *Límpao **con** este trapo; Partiu o pan **coas** mans.*  
**Movemento:** *Mañá imos **a** Combarro.*  
**Carencia:** *Non conduce **sen** o carné.*  
**Finalidade:** *Vive **para** traballar; Merqueino **para** facer churros.*  
**Límite:** *Sigue **ata** a fin da rúa.*

Unha mesma preposición pode expresar distintos matices de significado:

*Gústame esta mesa **de** centro. (caracterización)*  
*Este ordenador é **de** lago. (posesión)*  
*Tráeme ese bote **de** plástico. (materia)*

## Verbos e expresións con preposición

- Teño **dificultade/facilidade para** encontrar parella.
- Non **renuncio á** miña independencia.
- **Estouille dando voltas á** idea de formar unha familia.
- Se estás en parella, non podes **pensar só en** ti.
- **Perdín a cabeza por** Martiño, pero a relación non funcionou.

## Expresar condicións e consecuencias hipotéticas

En galego, para falar dunha condición cuxo cumprimento é imposible ou consideramos pouco probable, emprégase o pretérito imperfecto de subjuntivo. Para falar das supostas consecuencias desa condición, úsase o pospretérito.

### CONDICIÓN

Se tivese máis tempo,

### CONSECUENCIA

iría ao ximnasio todos os días.

(= non teño tempo agora e a posibilidade de telo é bastante remota.)



Moitas veces, nas construcións condicionais é posible omitir algunha das partes.

- Pero non ías mercar outro coche?
- Si, (*mercaría outro coche*) **se tivese** cartos.
- Cres que todos aceptarían traballar as fins de semana?
- Home, **se lles pagasen ben...** (*todos o aceptarían*)

## Falar dunha calidade

### ORACIÓNS DE RELATIVO

que me comprenda/que saiba escoitar/que pense coma min/a quen lle guste viaxar.

Gustaríame coñecer unha persoa...

### ADJECTIVOS

sincera/extravertida/inteligente...

### COMPLEMENTOS PREPOSICIONAIS

con encanto/sen medo aos retos/de bos principios.

## Conectores

### MATIZAR UNHA INFORMACIÓN

- Nestes tempos, vivir só é diferente; **de feito**, ser solteiro está de moda.
- Non me molestaría traballar de noite; **en realidade**, gústame.

### ORGANIZAR A INFORMACIÓN E ENGADIR NOVOS ELEMENTOS

- **Por unha banda**, apetécame estar con alguén; pero, **por outra (banda)**, dáme un pouco de medo. Penso, **ademais**, que a convivencia afecta a calquera relación por moi ben que se leven dúas persoas.

### OPONER INFORMACIÓN

- Estar só non é ningunha traxedia; **ao contrario**, é unha oportunidade que tes para coñecerte e aceptarte como es.
- Eu, se puidese escoller, **en lugar de/en vez de/no canto de** estar só, preferiría estar ben con alguén.

### DESMENTIR UNHA INFORMACIÓN DANDO UNHA EXPLICACIÓN

- **Non é que** non me guste vivir só; **o que pasa é que** estou mellor en parella.
- Que raro que non pidas peixe! Pásache algo?
- Non, home non. **O que pasa é que** hoxe me apetece variar.

## 4. O DIARIO DE TERE

**A.** Aquí tes o blogue dunha rapaza que ten moitas dúbidas. Comenta co teu compañeiro que cres que pode facer na súa situación. Con que consellos estás máis de acordo? Poderías completar os que aparecen cortados e engadir algún máis?

### Martes 12

Boas novas: déronme o traballo en Barcelona. Tiña ganas dun cambio de aires e... apetécame vivir nunha cidade tan moderna e de deseño... Pero agora vén o malo: que fago con Xabi? Despois dun ano de relación, non sei se pedirle que veña comigo. Non quero que deixe os seus fillos por min... Polo de agora non llo pedín. Non me atrevo a aceptar o traballo e marchar soa a Barcelona. Pero tamén me dá medo rexear a oferta e arrepentirme despois. Que podo facer? 😊



### Mércores 13

Levo toda a semana un pouco descolocada. Todo me fai lembrarme del. Conteivos algunha vez o de Xabi e as súas mensaxes románticas? Cando queda a durmir na casa e ten que espertar antes ca min, non hai un día que non me deixe unha mensaxe de amor pola casa, ou un post-it no espello do baño, ou na neveira, ou pegado na porta do armario, sempre deixa un "quérote" ou un "bos días ruliña", ou un poemiña, calquera cousa que eu vaia atopar. Unha vez que volví dunha viaxe de traballo, cando cheguei á casa tiña un ramo de flores precioso cunha notiña que puña "non hai peor castigo que a túa ausencia". E é que xa me ten tan mal afeitada que un día que non atopei nada levei un desgusto! Pero, cando estaba a piques de saír, metín a man no bolso para buscar as chaves e atopei unha nota que puña: "princesa, hoxe estás abraiante". Detalles así fan moi especial a miña relación con Xabi. Creo que sen el me sentiría moi soa, triste coma unha planta á que non coidan, nin lle botan auga, nin nada... Entre marchar soa para Barcelona, pero cun bo traballo ou quedar cunha xefa odiosa, pero con Xabi e o seu agarimo, non sei que elixir... Ai, esta indecisión toléame! 😊



1. Non deberías ser tan romántica. Que terá iso que ver co amor?
2. Pero ti cres que non vas atopar outro coma Xabier? Pero se o mundo está cheo de rapaces bos, auténticos e románticos...Ti fai o que teñas que facer e non penses tanto.
3. Eu marchaba, con ou sen el.
4. Que complicado! Se eu me atopase nuha situación coma esa...
5. Pois non sei que faría se tivese que escoller entre o amor e o traballo. Creo que...
6. Creo que non tería moitas dúbidas con alguén coma Xabier. Eu se fose ti...

**B.** E ti? Participarías nun blogue ou segues algún na rede? Coméntao cos teus compañeiros.

- *Eu non escribo ningún diario na rede, pero sempre que podo leo o dunha señora moi graciosa que...*

## 5. CITAS RÁPIDAS

**A.** Oíches falar das citas rápidas? Danse entre grupos de homes e mulleres nas que todos teñen uns minutos para falar con cada persoa do outro grupo. Este breve contacto serve para saber que persoa lle interesa. Que che parece? Participaches nalgunha? Comentádeo en pequenos grupos.

- *A min coñecer xente deste xeito paréceme unha trapallada. Eu prefiro...*




**B.** Imaxina que participas nun encontro de citas rápidas. Individualmente, elabora as sete preguntas que lle farías a unha persoa para saber se queres saír con ela outro día. Coméntaas cos teus compañeiros en grupos de tres e, xuntos, escollede as sete mellores. Tentade darlles forma de test con opcións.

## 6. TENDENCIAS



**A.** Aquí tes tres preguntas dunha enquisa que un grupo de estudantes realizou para coñecer os hábitos e os gustos das persoas do seu contorno. Para cada pregunta, vas escoitar as respostas de dúas persoas. Anotade que prefere cada unha e por que.



### 1. Viaxar só ou en grupo?

a.

b.



2. Traballar só na casa ou en equipo nunha oficina?

a.

b.



3. Clases presenciais en grupos ou individuais por Internet?

a.

b.

**B.** En grupos de catro, comentade as vosas opinións sobre estes temas.

• *Eu prefiro viaxar soa. Creo que é máis...*

**C.** Agora contádelle ao resto da clase cal é a opinión maioritaria do voso grupo.

## 7. QUE É UN AMIGO?

**A.** Unha publicación ofreceu un premio á mellor definición de “amigo”. Estas son algunhas das propostas que recibiron. Cal é a mellor para ti? Poderías escribir a túa definición de amigo?

### PARA MIN UN AMIGO...

**1.** é unha persoa que sempre che dá o seu apoio, que está contigo nos bos e nos malos momentos e que, cando te axuda, non che pide nada a cambio.

**2.** é aquel que se alegra cando ti estás alegre e sofre cando ti sofres.

**3.** non é o que che di só o bo que es, senón alguén que che di abertamente os teus defectos e erros. Non é só aquel no que podes confiar, senón o que confía plenamente en ti.

**4.** é aquel a quen lle dis “necesito estar só un minuto”, pero interpreta “queda comigo para sentirme máis seguro”. É a persoa que entende os teus silencios, as túas mensaxes.

**5.** é alguén por quen farías calquera cousa, a quen lle darías todo. É a única persoa coa que irías a unha illa deserta.

**6.** é aquel que queda contigo cando todo o mundo marchou.

**B.** Pensa agora en calidades para cada unha destas persoas e obxectos. Compara as túas respostas coas dos teus compañeiros e, entre todos, elixide a mellor da clase para cada categoría.

UN BO PROFESOR DE GALEGO

UN BO COMPAÑEIRO DE CLASE/DE TRABALLO

UN BO LIBRO PARA APRENDER GALEGO

Un bo profesor/compañeiro/libro é aquel co que

A un bo profesor/compañeiro/libro pediríalle que

## 8. A NOSA PARELLA IDEAL

**A.** Imos procurar a nosa parella ideal, trata de definila segundo estas calidades, numéraas (do 1 ao 9) segundo a importancia que lle deas a cada unha. Explicalle ao teu compañeiro por que escolliches esa orde e comprobade se coincidides nos vosos criterios.

- |  |   |
|--|---|
| <input type="checkbox"/> sinceridade   | <input type="checkbox"/> tenrura          |
| <input type="checkbox"/> curiosidade   | <input type="checkbox"/> sentido do humor |
| <input type="checkbox"/> xenerosidade  | <input type="checkbox"/> valentía         |
| <input type="checkbox"/> sensibilidade | <input type="checkbox"/> paixón           |
| <input type="checkbox"/> complicidade  |   |

• *Pois para min a máis importante é o sentido do humor. O Ai si? Eu pensei que sería a tenrura.*  
 • *A ver, non é que non sexa importante... pero é que se non me podo rir coa miña parella...*

**B.** Agora imos definir cal é a nosa parella ideal, para iso pensa como che gustaría que fose atendendo aos seguintes parámetros.

- na súa relación comigo:
- na súa relación coa miña familia:
- na súa relación cos meus amigos:
- en relación coas miñas manías:
- en relación cos meus intereses e afeccións:

## 9. PERSOA NOVA E SOLTEIRA

**A.** A continuación, tes uns fragmentos extraídos de diferentes informacións aparecidas nun xornal. Despois de deles, tenta relacionalos cos titulares de prensa que aparecen a continuación.

**1** Cada vez son máis as persoas solteiras que non se resignan a pasar as fins de semana deitadas no sofá, vendo como pasa o tempo. Por iso, nos últimos anos, proliferaron os lugares de ocio para solteiros, incluso en Galicia proliferaron os clubs que permiten coñecer persoas que non teñen parella. Así é que moitas persoas solteiras, separadas ou viúvas se xuntan para organizar viaxes en grupo ou actividades de lecer. Entre as que se crearon nos últimos anos destacan os cruceiros para solteiros, actividades de fin de semana ao aire libre ou incluso proxectos de cooperación internacional só para solteiros.

**2** Estar separado e divorciado é cada vez máis habitual na sociedade galega, fronte á situación de hais uns anos, cando unha persoa separada constituía un status ben diferente á media. Así o declara o chairego Isidro, recentemente separado: “A miña situación agora non é nada rara. Hai uns anos, si. Por exemplo, cando meu irmán Manolo se separou da muller era visto na miña aldea con estrañeza, pero agora é unha situación que se repite con máis frecuencia. Claro que non é nada do que me sinta orgulloso, nin reconforta que outras persoas teñan que pasar polo mesmo, pero a miúdo é unha grande axuda poder compartir como te sentes con persoas que están na túa mesma situación. Por exemplo, eu os luns acostumo ir xogar ao fútbol cun grupo de amigos e a maioría está pasando polo mesmo ca min. E así, entre goles, as cervexas de despois e uns risos, a soidade da chegada á casa é menos dura”.

**3** Os recentes incentivos concedidos ás empresas supuxeron un alivio para moitos traballadores. Algúns deles levaban xa moito tempo no paro e, ademais, víanse na obriga de rexeitar algunhas ofertas laborais por non seren compatibles co coidado dos fillos.

Estas medidas supuxeron, polo tanto, un estímulo para as empresas á hora de contratar persoal laboral con responsabilidades familiares e que contribuíu a que a conciliación entre a vida laboral e familiar comece a ser unha realidade. Todo para que o benestar persoal non quede só a expensas das axudas desinteresadas dos avós.

**4** As posibilidades de independizarse dos máis novos son cada vez máis tardías e difíciles. En Galicia, aínda que a tendencia nas provincias atlánticas é menor, no seu conxunto, o índice de mozos que aínda vive con seus pais é cinco puntos superior á media europea. A maioría confesa que preferiría emanciparse e non vivir cos seus pais e cos irmáns, pero recoñecen que son diversos os factores que impiden levar a cabo os seus propósitos. Entre as dificultades para encontrar un espazo propio, a mocidade galega menciona a carestía da vivenda, a posibilidade de aforrar en alugamento uns anos e conseguir casa propia ou incluso gozar dos coidados paternos, aínda a custa de compartir fogar.

**5** Traballan as mesmas horas, están sometidos aos mesmos convenios, pero non teñen a mesma calidade de vida. Apenas teñen liberdade para organizar o seu traballo e están sometidos a unha axenda semanal moi rixida, xa que os coidados dos fillos obríganos a unha planificación da semana moi estricta. Tampouco as empresas colaboran en exceso á hora de superar estas dificultades, debido a que non optan por horarios máis flexibles que permitan unha vida máis conciliadora, aínda a expensas de teren uns traballadores máis cansados e desmotivados.

..... **Os fogares unifamiliares de separados e divorciados creceron en Galicia nos últimos 10 anos.**

..... **Persoa nova e solteira que aínda vive cos seus pais.**

..... **As persoas solteiras e con fillos son as que menos flexibilidade horaria teñen.**

..... **Os solteiros queren gozar da vida.**

..... **Axudas fiscais para contratar nais e pais solteiros.**

**B.** Cal das situacións que se describen che resulta máis coñecida? Se non es galego, no lugar onde vives, existen situacións parecidas? Coméntao co teu compañeiro.

**C.** Agora busca na prensa outros titulares de noticias que teñan que ver con xente que vive soa.